



Na osnovu člana 3.8. stav (1) Izbornog zakona Bosne i Hercegovine („Službeni glasnik BiH“ br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14 i 31/16), člana 4. stav (1) Pravilnika o vođenju i upotrebi Centralnog biračkog spiska („Službeni glasnik BiH“ broj 37/14), člana 50. alineje 2., 5. i 18. Statuta Općine Novo Sarajevo („Službene novine Kantona Sarajevo“ br. 35/10 i 45/19), Općinski načelnik, d o n o s i

P R A V I L N I K O CENTRU ZA BIRAČKI SPISAK

Član 1.

Pravilnikom o centru za birački spisak (u daljem tekstu: Pravilnik) utvrđuje se način rada Centra za birački spisak Općine Novo Sarajevo (u daljem tekstu: Centar).

Član 2.

Unutrašnja organizacija i sistematizacija Centra, način rukovođenja Centrom, ovlaštenja u vođenju Centralnog biračkog spiska, odgovornost zaposlenih u Centru, uređuju se u okviru Pravilnika o unutrašnjoj organizaciji Općine Novo Sarajevo, broj: 02-05-258/19 od 12.06.2019. godine - Služba za poslove Općinskog vijeća i lokalnu samoupravu.

Član 3.

Centar za birački spisak uspostavlja se u prostoriji koja će biti vidno označena, opremljena, pored ostalog i jednim računarom koji će se koristiti za potrebe Centra, telefonskom linijom sa direktnim izlazom, te internet konekcijom i aplikacijom za vođenje Centralnog biračkog spiska.

Član 4.

Obuku zaposlenih u Centru obavlja Općinska izborna komisija Općine Novo Sarajevo (u daljem tekstu: OIK), na osnovu posebnog plana i programa, koji je obavezna donijeti u skladu s planom i programom edukacije organa za provođenje izbora, koje donosi Centralna izborna komisija BiH (u daljem tekstu: CIK).

Član 5.

(1) Centar za birački spisak:

- a) pruža tehničku pomoć OIK u određivanju biračkih mjesta na teritoriji Općine Novo Sarajevo (u daljem tekstu: Općina) i raspoređivanju birača po biračkim mjestima, ažurira podatke o biračkim mjestima i promjenama biračke opcije u skladu sa aktima CIK, vodi evidenciju o svim naseljenim mjestima i nazivima svih ulica na teritoriji Općine i o svim promjenama obavještava OIK,
- b) prima zahtjeve raseljenih lica za određivanje ili promjenu biračke opcije i putem odgovarajućeg programa vrši obradu zahtjeva,
- c) prima zahtjeve za promjenu biračke opcije lica upisanih u Izvod iz Centralnog biračkog spiska za glasanje izvan BiH, a radi se o licima koja su se vratila u zemlju prije roka utvrđenog za zaključenje Izvoda iz Centralnog biračkog spiska,
- d) učestvuje u realizaciji izlaganja Izvoda iz privremenog Centralnog biračkog spiska,
- e) osigurava uvid u Izvod iz Centralnog biračkog spiska na teritoriji Općine,
- f) osigurava i druge podatke za Centralni birački spisak koji su utvrđeni aktima CIK,

- g) pruža tehničku pomoć OIK, u vezi sa zahtjevima i prigovorima birača, koji se odnose na Izvod iz Centralnog biračkog spiska,
- h) pruža tehničku pomoć OIK prilikom imenovanja biračkih odbora (pomoć pri žrijebanju, izradi akata o imenovanju, obuke biračkih odbora i sl.),
- i) pruža tehničku pomoć OIK prilikom provjere i pripreme biračkih,
- j) pruža tehničku pomoć OIK u kampanji obavještanja birača o svim segmentima u vezi s izbornim procesom,
- k) pruža tehničku pomoć OIK prilikom objedinjavanja izbornih rezultata na području Općine, a CIK obavezan je dostaviti rezultate sa svih redovnih biračkih mjesta, u elektronskoj verziji, urađenoj u računarskom programu dobijenom od CIK, za sve nivoe i sve kategorije (po političkim subjektima i kandidatima unutar političkih subjekata) i
- l) druge poslove koje mu odredi CIK i OIK.

(2) Centar za birački spisak vodi evidenciju podnesenih zahtjeva i prigovora iz stava (1) tačka g) ovog člana i dužan je čuvati dokumentaciju priloženu uz te zahtjeve i prigovore.

Član 6.

- (1) Općinski načelnik odgovoran je za rad Centra za birački spisak.
- (2) OIK ima pravo izvršiti kontrolu rada Centra za birački spisak.
- (3) OIK će pokrenuti postupak po službenoj dužnosti, protiv zaposlenog u Centru za birački spisak, koji povređuje prava birača ili političkog subjekta ustanovljena Izbornim zakonom BiH i Pravilnikom o vođenju biračkog spiska.
- (4) Centar za birački spisak podnosi sedmični izvještaj CIK, putem OIK.

Član 7.

- (1) Redovno radno vrijeme Centra za birački spisak jednako je radnom vremenu organa uprave Općine.
- (2) Ako se u određenom periodu poveća obim posla, Općinski načelnik može samostalno ili na prijedlog OIK, naložiti da Centar za birački spisak radi i duže od redovnog radnog vremena, kao i da radi u neradne dane, u smjenama i sa više izvršilaca.
- (3) Centar za birački spisak je obavezan na pogodan način obavijestiti birače o radnom vremenu Centra.

Član 8.

Na sva pitanja koja se odnose na vođenje i upotrebu Centralnog biračkog spiska, koja nisu regulisana ovim Pravilnikom, primjenjuju se Izborni zakon Bosne i Hercegovine i Pravilnik o vođenju i upotrebi Centralnog biračkog spiska.

Član 9.

Ovaj Pravilnik stupa na snagu narednog dana od dana objavljivanja u „Službenim novinama Kantona Sarajevo“, a objaviće se i na web stranici Općine.

Broj: 01-10-665/20
Sarajevo, 31.01.2020. godine

